

# 1 Pita

## Pita eter kiyi basrasem siglow.

*Kiyi late tuma.*

Gwor siglow Pita re basrasem, Turki nowselke temenem Jisas rene omuteke habobem tatame remne newopitim. Romri gavman tame rem remne kwom panen simenem, rem er Jisas rene omuteke habobem tatame remne yaper nenbem. Rem nugwape mus meten pap yaper tebem, eker Pita re remne gwor siglow basrasen remne pap kitimena newobo tuma remne basrasen newopitim.

Re remne op basrasem. Kem Jisas rene som habobet. Kem reri wule som nenbet. Jisas eter, re mus bukure meten taskuren sam, re wow sene poten sene wayen sin yim. Re sene yate tetane, re nemne potte. Er yabel kem habon heyar kowte.

God re kemri omuteke habobokap seilabo. Kem rene mesegente o rene be mesegente, re etop late, eker agerbo tame rem kemne yaper nenbo. Kem rene be mesegente, re kemne tokwo yenbo-subuwai Hevenke newote tetane. Eker kem God eterri wule heyar sete. Pita re etop basrasem.

**Nem God eterri sukuw sekene  
tem, eker nem wule yenbowou  
nenen yin yuri potte yenbo was  
heyar kowbet.**

*(Sapta 1:1–2:10)*

<sup>1</sup> An Pita, Jisas Kraiss eterri werasen yi tame. Kem God eterri tatame, an kemne gwor siglow basrasbo. Kem keremri maima kwom mesegenen yikwute yakwutem, kem Pontus, Galesia, Kapadosia, Esia, Bitinia yokwok yin, kem yatamekap etek tetane. <sup>2</sup> Kiyisapewai Apiy God re kemne habon kenem, re kemne eterri tatame tete wem. Jisas Kraiss rerri nepke nemri wule yaper wiykiyam, kem eterri tuma heyar meten nente wem, eker God Eterri Wow re kemne heyarem, kem tatame yenbowai tem. God re kemne pap meten kwobo nugwape late. Re kemne pap pultete, kem pap yenbo temente.

*Nem Hevenke yite, nem heyarwai temente.*

<sup>3</sup> Neremri Haneyen Jisas Kraiss eterri Ha, eterri Keryen Yen God, rene nem wese abo. Re nemne pap bukri metem, re Jisas Kraiss rene wow sene newom, eker nem wuribai ager poten eterri tatame tem. Etop tetane, nem yuri tetekap metekwasen heyar kowtene. <sup>4</sup> God re rerri tatame remne nentekap, remne newotekap, re nemne etop kirkir nente tetane. Er yenbosubu wos, et yaper be tete, kupa be tete, kwuta be tete. Yehow. Er wos re Hevenke lakerebo, re kemne newote tetane. <sup>5</sup> Kem God rene omuteke habobo, eker eterri kitimena bukri re kemne heyar lakerebo kem heyar tete tetane. Nowsel legete yabel tetek, re kwom geike kemne poten kem pow tete tetane.

<sup>6</sup> Kem er tuma som habon okbop te. Gwopte yabel God re webu, metkereke yaper wos kemne ten kem pap yaper tete. Er yabel keraket ten tibaite tetane. <sup>7</sup> Etopkap God re kemri omuteke

habobo wule etop seilabo. Kap, kemri omuteke habobo wule sekene o sekene bo? Re etop late selbo. Gol et yenbo vos, sou be temente vos. Tame rem gol kerke lisen op seilabo. Et gol sekene o sekene bo? Keremri omuteke habobo wule et gol rene teitkwunbo vos. Opkap, yaper vos kemne tete, et kemri omuteke habobo wule seilabo. Kem kebese taskuren omuteke som habote, Jisas Krai re tegek tete yabelke, re kemne pir wen tuma yenbowai wete. Kem sig bukrekirkir potte tetane. <sup>8</sup> Kem Jisas rene be latene, kem rene pap yewobo. Gwopte mere, kem rene be latene, kem rene omuteke habobo. Kem okbop nugwapewai tebo. Kem er tebo okbopkap re bukrewai, kem kebese be wesowte. <sup>9</sup> Kemri rene omuteke habobokap, God re kemne potte tetane, kem heyarsubu som-temente tetane.

<sup>10</sup> God eterri kiyi temenem tuma wesowbem tame rem op wem. God re kemne pap meten potte. Rem etop wem, rem tuma tobo omuteke sopen wemetbem. <sup>11</sup> Krai Eterri Wow re etemkene temenem, etopkap Krai eterri mus metemkap eter Haneyen bukrekimenemkap rem etop heyar wesowbem. Rem op wemetbem. God re berke nente, re tatame remne potte? Be yabel re etop nente? <sup>12</sup> God re remne op wem. Kerem wesowbo tuma et keremne kworer kwobo be late. Yehow. Et yuri tete tatame etemne kwobo late tuma. Re etop wem. Er yuri tete wem tatame, rem kerem. Rem wesowbem tuma, God Eterri Tuma Yenbo wesowbo tame rem kemne wesowbem. God re Eterri Wow rene werasem, re Heven mesegenen yan eterri kitimenak rem kemne er Tuma Yenbo wesowbem. Etem kemne wesowbem tuma, God

reri kwomri tame mere, rem er wos heyar late habobo.

*God re nemne tatame yenbowai tete wepotem.*

<sup>13</sup> God re kemne potte wem, eker kem wuribai heyar habon kowte. Kem kworer heyar lakere. Jisas Kraiss eter tegek tete yabelke re kemne yenbowai nentekap, kem etop omuteke habobet.

<sup>14</sup> Kem God Reri Tuma wan wurik meten nen. Kiyi kem wor temenem, kem yaper wos nente habobem. Kem etopkap sene kap nente. <sup>15</sup> Kemne wepotem God, re yenbowai. Re wule yenbowou nenbo. Kerem mere, kem tatame yenbowai te. Be wos kem nenbet, kem yenbo wulewou nenbet.

<sup>16</sup> God Reri Basrastene Tuma et op webou.

Aren, an yenbowai. Eker kerem mere, kem yenbowai te.

(Wok Pris 11:44-45; 19:2)

*God re nemne tokwo bukrek tupan potem.*

<sup>17</sup> Kem God rekene namrebo, kem rene Apiy webou. God re aboyei tatame remne se pete, re remri sig be habote, re remri nenbokapwou sin lan se pete. Opkap, kem nowselke ten yan kem rene aken reri kulke temente. <sup>18</sup> Kem mettene, yeiwarege rem kemne newom wule et kelpem emik yim, eker God re kemne tupan potem. Kem mettene, yaper tebo kel, golkene silvakene, etopkap kelke re kemne be tupam. Yehow. <sup>19</sup> God re kemne tokwo bukrewaike tupam. Re kemne Kraiss eterri nepke tupam. God rene kwar pebo wule, Juda tatame rem sipsip yen yenbo, wesom me gergerbo sipsip remne poten God rene kwar pebo.

Krais re wesom me gergerbo sipsipkap, re yenbo-subuwai. <sup>20</sup> Nelkene nowselkene be nenmenem, God re Krais rene leban werasen yate wem. Re kemne kwobo late wem, opkap gwopte nowsel legete matnabo wulek Krais re tegek tem. <sup>21</sup> Krais eterke kem God rene omuteke habobo. Re samke, God re rene wow sene newon re selek sene wayen sim. God re rene sig hadebaswai newom. Opkap, kem God rene omuteke habobo, eter kemne nente wemkap kem okbop ten heyar kowbo.

*Nem Jisas rene omuteke habobo gesmase remne pap yewobet.*

<sup>22</sup> Kem wule sekene heyar meten nenbem, eker kem kemri wuribai kworer heyar tem. Op tem, kem God rene omuteke habobem gesmase remne omuteke pap yewobo. Opkap kem pap teten awosein awosein muresen pap yewobet. <sup>23</sup> God reri somsom temente kitimenakene Tuma, kem tatame ager tem, kem eterri yen tem. Keremri Apiy re more tame bo. Kemri Apiy re somsom temente tetane. <sup>24</sup> God Reri Tuma op webu.

More tatame rem som be temenbo. Rem topkap. Remri kitimena, purere et me walkwukap. Top rem sok ten sabo. Me walkwu rem sok ten yerbokap tatame rem sabo wule kitimenakene purarekene aboyei kirkir sabo.

<sup>25</sup> Keryen Yen God Reri Tuma et somsom temente tetane.

(Aisaia 40:6-8)

Er tuma et Tuma Yenbo rem kemne wesowbem.

## 2

*Haneyen re somsom yeworuwem kwobor nawo segkap.*

<sup>1</sup> Kem wuribai ager potem. Opkap, kem yaper saper wos sene mane nente. Kem tuma mane yikokote, kem agerbo agerbo yikoko wule mane nente. Kem tatame remri wos, remri nenbokap mane ayekutete. Kem kerebo tuma mane wete. Opkap wule kem mesegen. <sup>2</sup> Geibile yen rem muk ate tekatekabokap, kem God eterri wule potte tekatekabo. Op nente, kem God eterri tatame sespe ten God rekene heyar temente. <sup>3</sup> God Reri Siglowri Tuma op webo.

Haneyen re kemne nenbo wule

kem seilan op sanetene.

Haneyen re kemne yenbo nenbo.

(Buk Song 34:8)

<sup>4</sup> Kem Haneyen rene meknik yan te. Re somsom yeworuwem nawo segkap. Tatame rem rene yaper lan mesegenem. God re rene kenem, re rene yenbowai wem. <sup>5</sup> Kerem, kem kelpete tetane ake teban, magel, taikwokap. Kem kirkir ten God Reri Wow re kemne poten God Eterri Kwobor ek nenbo. Opkap kem Reri Kwoborri yaku nenbo tatame yenbowai tete. Sene Jisas Kraisa eterke kem keremri yakukene wesomkene God rene etek newon re kemne metekwaste.

<sup>6</sup> God Reri Siglowri Tuma op webo.

Meteye. An kenem nawo seg yenbo

ake Saion kwowke nenbo.

Er seg rene omuteke habote tatame, rem pap yaper be tete.

(Aisaia 28:16)

<sup>7</sup> Kem rene omuteke habobo tatame, kem op webo. Krais re nawo seg yenbowai. Omuteke be habobo tatame rem gwopkap.

Ake nenbo tame remri  
muwen mesegenem seg,  
re kwobor nawo seg tem.

(Buk Song 118:22)

<sup>8</sup> Sene God Reri Siglowri Tuma op webo.

Er segke tatame rem tewo  
etek tubanete tetane.

Remne tewo er segke  
tubanen rem waren yaper tete tetane.

(Aisaia 8:14-15)

God eter kiyi wemkap, rem eterri tuma be meten nenem, eker rem tewo etek tubanen waren tukan yaper tem.

<sup>9</sup> Kem God reri kenem tatame. Kem Keryen Yen God eterri Kwoborri yaku nenbo tatame. Kem tame beig yenbowai tetane. Kem God eterri tatame sekene. Kiyi kem kerneirke temenem, sene God re kemne wepotem, kem eterri yabel geike tetane. Re kemne lebam, kem reri wule yenbo nugwape tatame remne etop wesowbet. (Kisim Bek 19:5-6; Lo 4:20; Aisaia 9:2, 43:21) <sup>10</sup> Kiyi kem God eterri tatame be temenem. Sene kem God eterri tatame tem. Kiyi kem God eterri pap metbo wule be metmenem, gwopte God re kemne pap metbo.

**Nem agerbo tatame remkene  
temente, nem wule yenbowou  
nenbet.**

(Sapta 2.11–3.22)

*Nem God eterri yaku nen tatame temente.*

<sup>11</sup> Ari gesmase sekene, gwor nowsel et keremri maima nowsel bo. Kem gwotek yatamekap tetane. Eker, an kemne webo. Wesomri wule yaper re kemri wuribai som naibo. Opkap kem wesomri wule yaper me sewayen magel tai. <sup>12</sup> Kem God Reri Tuma be metbo tatame remkene temente, kem wule yenbowou nenbet. Opkap rem kemne tuma nente, yuri rem op habote. Kem wule yenbowou nenem. God re sene yate yabelke, rem kemri nenbo yenbo wule sene habon God rene pir wete tetane.

<sup>13</sup> Kem Haneyen rene habote, kem gavman tatame remri tuma heyar meten etop nenbet. Gavman keryen yen re taresi tame bukri, reri tuma kem meten nenbet. <sup>14</sup> Reri werasem wulare wulare yokwokri gavman taresi tame etemri tuma mere, kem heyar meten nenbet. Re er tame remne wem, rem wule yaper nenbo tatame remne yaper sein nenbo. Wule yenbo nenbo tatame remne rem sig yenbo webo. <sup>15</sup> God re selbo, kem wule yenbo som nenbet. Eker tuma bop webo tamekene wor tetane tamekene rem tuma ribo tete. <sup>16</sup> Kem keremri wuribaike nente, kem wos yaper kap berasen nente. Kem God eterri yaku bop nen tatame temente. <sup>17</sup> Kem aboyei tatame remne wule yenbowou nenbet. Kem God eterri tatame remne pap yewon kwobo late. Kem God rene aken reri kulke temente. Kem nowselri keryen yen bukri rene tuma yenbowou wete.

*Krais re nenbempak, nem mus meten taskurte.*



<sup>18</sup> Kem yaku nenbo tatame, kem keremri yaku lakere tame etemri kulke wuren temente, remne tuma yenbowou webet. Kemne yenbo nenbo yaku lakere tame etemwou bo. Kemne yaper nenbo yaku lakere tame etem mere, kem remri kulke ten remne tuma yenbowou sein webet. <sup>19</sup> Rem kemne yaper bupo me nente, kem God eterri kulke ten mus meten taskurte. Kem be semarkwute, God re kemne metekwasen yenbo nente. <sup>20</sup> Kem yaper nente, rem kemne paku sein pete. Sene kem taskurte, kem map habobo, God re kemne metekwaste? Yehow, God re kemne be metekwaste. Kem yenbo wos nente, rem kemne yaper bupo me sein nente, kem taskurte, God re kemne ek metekwaste.

<sup>21</sup> Krais re kemne kwobo lan mus nugwape meten taskurbem. Opkap re kemne taskurbo wule peteram, kem er wule sete. God re kemne etop nente wem. <sup>22</sup> God Reri Siglowri Tuma op wem.

Re wos yaper be wuri nenem. Re tuma be wuri yikokom.

(Aisaia 53:9)

<sup>23</sup> Rem rene tame kwuyem, re remne tame sein be kwuyem. Rem rene yaper nenbem, re mus metbem, re remne yaper sein nente be wem. Re omuteke op habobem. God re aboyei tatame remne Heyar Se Pebo Tame. Eker re kworer God eterri letke rasem. <sup>24</sup> Rem mek kwuren Krais rene etek peikkeremke, re nemri nenbo yaper wos aboyei poten sen re ek sam. Re nemne kwobo lan sam, eker nem wos yaper kebese mesegenen wule yenbowou nenbet. Eter mus metem wulek, nem tatame yenbo tem.

<sup>25</sup> Sipsip rem kwom mesegenen boulke belen yibemkap, kem kiyi etopkap temenem. Sene kem kemri Sipsip Lakerebo Tame rene yan semowbo. Re kemri Wow Lakerebo Tame tetane.

### 3

#### *Nar panetene tatame etemne webo tuma.*

<sup>1</sup> Kem tamekene ta, kem keremri tame etemri kulke temen. Kemri God Reri Tuma be mettene tame, rem kemri nenbo wule yenbo late, rem God rene kirkir omuteke habote. Kem remne tuma wuri be weiwote, rem God rene omuteke habote. <sup>2</sup> Kem God rene aken wule yenbo nenbo ta, rem kemne etop late, opkap rem God rene omuteke habote. <sup>3</sup> Rem kemne kwuye late, kem kerap kworer kap wolete. Tare take basbo, golke nenem kerap wolebo, agerbo agerbo yenbo kanbo kerap wolebo. Yehow. Et kerap sekene bo. <sup>4</sup> Tatame rem kemne kwuye late, kem gwopkap nente. Kem keremri wuribaikene papkene kerap yenbo kanbo etek wolete. Kem wuribai yenbo potte, pap yenbo ten tuma heyar namrete. Er wule et yaper be tebo golke nenem gaituk yembokap. God re er wule metekwasbo. <sup>5-6</sup> Kiyi temenem ta yenbosubu rem God rene omuteke habon remri tame etemri kulke wuren temenem, agerbo tatame rem remne kwuye labem. Abraham eterri ta, Sara, te etop nenbem. Te tame reri tuma heyar meten rene keryen yen webem. Kem wule yenbo nenen be wos be wos be akte, kem Sara teri yen tete.

<sup>7</sup> Kem takene tame, kem keremri ta remkene heyar site. Kem sanetene, ta rem keremkap bo, rem kitimena bukure bo. God re ta remne pap

kirkir meten keremkene potte tetane. Opkap kem remne heyar habon wule yenbo nenbet. Kem remne etop nente, God re kemri rekene namrebo tuma kebese mette tetane.

*Kwokwos kwokwos nem agerbo tatame remne wule yenbowou nenbet.*

<sup>8</sup> Tuma legete nenbo, eker an kemne op webo. Kem aboyei, kem wuribai wuriwou te. Kem awosein awosein ne pap an pap metbet. Kem gesmase remne pap meten yewobet. Kem kworer kap gabote. <sup>9</sup> Tatame rem kemne yaper nente, kem remne yaper sein kap nente. Rem kemne yogu townete, kem remne yogu sein kap townete. Rem kemne yaper nente, kem God rene wemette, re remne yenbo nente. God re kemne wepotem, re kemne etopwou nente wem. Eker kem remne wule yenbo sein nente. <sup>10</sup> God Reri Siglowri Tuma op webo.

Yike tatame rem pap yenbo  
ten metekwaste habote,  
rem heyar temente habote,  
rem op nente.

Rem tuma yaper kap wete.  
Rem tuma kap yikokote.

<sup>11</sup> Rem wule yaper magel  
tayen yenbo wos nenbet.

Rem agerbo tatamekene  
wuribai wuriwou ten pap tetete.

<sup>12</sup> Wule yenbo nenbo tatame  
remne Keryen Yen re  
lakerebo.

Remri wemetbokap re  
aboyei heyar metbo.

Wule yaper nenbo tatame  
remne God re sewaibo.

(Buk Song 34:12-16)

*Nem wule yenbo nenen mus mette, nem metekwaste.*

<sup>13</sup> Kem wule yenbo omuteke nente pap tetebo, yike tame rem kemne yaper nente. <sup>14</sup> Kem wule yenbo nente, sene rane tame rem kemne yaper nente, kem metekwaste. Kem remne kap akte. Kem kap op habo op habote. <sup>15</sup> Kemri wuribaike kem Krai rene op habote. Re ari Haneyen. Opkap agerbo tatame rem keremri omuteke habobokap kemne wemette, kem kiyi heyar habon remne yenbo sein ek weiwete. <sup>16</sup> Kem remne sein wete, kem remne tuma tobokene elen me weiwene wule yenbo nente. Kem yaper wos kap nente, opkap kemri wuribai yenbo temente. Kem etop nente, agerbo tatame rem kemne tuma yaper wete, rem sebera yate. Kem Krai eterri sukuw, kem wule yenbowou nenbo, rem kemne tuma yaper bupo me webo, eker rem sebera yate. <sup>17</sup> God re kirkir tete, kem wule yenbo nenen rem kemne yaper sein nente, et yenbo. Opkap, kem sig yenbo potte. Kem wule yaper nente, rem kemne yaper sein nente, kem sig yenbo be potte. Yehow. Kem sig yaper potte.

*Krai re sam, re sene wayen sim, eker re nemne potte.*

<sup>18</sup> Krai eter re kemri nenbem yaper woske sam. Tewo wuriket re aboyei yaper nen woske sam. Et yow, re sene be sate. Re tame yenbo, re nemne tame yaper kwobo lan sam. Opkap, re nemne God rene panen yite. Eterri more wesom rem

pen sam, sene God re rene Hevenri Wow newom, re som tetane. <sup>19</sup> Eterri Wow re gambo kwomke yin gambo remne tuma wesowbem. <sup>20</sup> Noa re temenem yabel, rem more tatame temenem, rem God Reri Tuma nasweibem. God re remne kowlaweyem, rem wuribai yenbo be potem. Er yabel Noa re pere bukri wuri nenem. Tatame letrane kelare mur kere, etemwou rem perek warem, rem okke be abun sam. Etemwou rem pow tem. <sup>21</sup> Rem ok mesegenen pow temkap, et gwotepte kem okke waren tirmunbo wule pow tebokap. Okke tirmunbo wule et ok wiyen wes sili kerebo wule bo. Yehow. Tatame rem wuribai yenbo poten God rene tuma teikten op webo. An neri tuma heyar meten wuribai yaper mesegenbo. Op webo tatame remne okke tirmunte. Jisas Kraisi re san sene wayen yim, eker God re remne potte tetane. <sup>22</sup> Kraisi re Hevenke yawum, re God eterri let mame yokwok sitene. Etek sitene, God eterri kwomri tamekene kiti-menakene omugambokene aboyei kitimenakene wos, aboyei, rem Kraisi eterri kulke tetane, re remne panen sibo.

## **Yaper seilabo wule bukri Jisasi reri tatame remne tem, rem taskurem.**

*(Sapta 4–5)*

### **4**

*Nem kiyiri wuribairi wule yaper mesegente.*

<sup>1</sup> Kraisi re eterri wesomke mus bukri metbem, eker re reri wuribairi habomkap, kem etop

habon purere potte. Wesom mus metbo tatame rem yaper wos sene be nenbo. <sup>2</sup>Opkap, kem gwor nowselke temente, kem nowselri tatame etemri metkereke wuribai sene kap nente. Kem God eterri wuribaiwou nenbet. <sup>3</sup>God rene be habobo tatame rem nenbopak, kiyi kem etop nenbem. Rem bisi yibem, rem wule yaper pap tetebem, rem ok yaper an sisi pebem, rem sekwo yaper lomun yage taibem, rem bulpare tebem, rem sukwiye yaper wurabem. Kiyi kem opkap nenbem, et yow. <sup>4</sup>Sene kem God Reri Tuma be metbo tatame remkene opkap yaper saper wos be nenbo, eker rem danekene seken kemne tame kwuyebo. <sup>5</sup>Yuri rem Tuma Metbo Tame eterri bitmi tobok teten rem remri yenbo o yaper nenbo wulekap rene wesowte, re remne tuma nente tetane. Tuma Metbo Tame re le kelpe tetane tatamekene sam tatamekene remne se pete tetane. <sup>6</sup>Etop tete tetane, eker sam tatame rem Tuma Yenbo metem. Aboyei tatame remne sin lan se pebo wulek God re remne wem, rem kiyi sam. Gwopte rem wow som tetane. God eter tetanekap, rem wowkene som temente.

*God re nemne kitimena newobokap nem yaku heyar me nente.*

<sup>7</sup>Aboyei wos legete yabel matnaye, eker kem wuribai yenbo ten heyar habo. Op nente, kem God rekene tuma kebese namrete. <sup>8</sup>Bukre wos wuri kem kiyi nen. Kem awosein awosein habon pap omuteke yewobet. Pap yewobo wule re nugwape wule yaper subragerbo. <sup>9</sup>Kem kemne lasyabo tatame remne pap yewon awos newon an tukna emi newote. Kem etop nente, kem kap

semarkwute. <sup>10</sup> God re kemne wulare wulare pap meten metkereke kitimena newom. Kem er kitimena heyar sen agerbo tatame remne kwobo labet. Kem etop nente, kem God eterri pap metbo wule heyar lakeren yaku yenbo nenbet. <sup>11</sup> Tuma wesowbo kitimena potem tame, rem God Reri Tumawou wesowbet. Tatame remne kwobo labo tatame, rem God re remne newom kitimenak yaku etek heyar nenbet. Eker be wos be wos tete, tatame rem Jisas Kraiss eterke God rene sig bukri wete. Re hadebaswai som temente tetane. Reri kitimena sikabe som temente tetane. Et sekenewai.

*Kraiss re mus metemkap, nem kirkir mette, nem okbop tete.*

<sup>12</sup> Ari gesmase yenbo, be wos be wos yaper kemne seilan kem mus mette, kem danekene kap sekete. Et danekene sekebo wos bo. <sup>13</sup> Er yaper wos kemne tete, kem op habote. Kraiss eter metem muskap nem kirkir metbo, opkap nem okbop tebo. Yuri Kraiss reri sig hadebas tegek tete, kem okbopwai ten boteyatete tetane. <sup>14</sup> Kem Kraiss eterri sukuw, er kwobo, agerbo tatame rem kemne tame kwuyete, kem okbop tete. Opkap tete, nem sanete, sig hadebaskene Wow, et God Eterri Wow, re keremkene tetane. <sup>15</sup> Kem heyar la. Kem wule yaper nenen mus bukri mette, kemkene mette, tuma bo. Alwo pen sabo, bisi abo, wule biragiyebo, o kerebo tuma weba, etop nenbo tatame rem mus bukri mette tetane. Kem etopkap mus kap kirkir mette. <sup>16</sup> Kem Kraiss rene omuteke habobem, rem kemne yaper nenen kem

mus mette, kem sebera kap yate. Kem Kraisi eterri sigkene, eker kem God rene wese ate.

<sup>17</sup> God re aboyei tatame remne tuma nente yabel matnaye. Eterri tatame remne re kiyi tuma nente. Sene re reri Tuma Yenbo meten nasweibo tatame remne berke nente? Re remne yapersubuwai nente tetane. <sup>18</sup> God Reri Siglowri Tuma op webo.

Yaku bukre keren wule  
 yenbo nenbo tatame remne  
 God re heyarte tetane.

Wule yaper nenen God rene  
 magel taibo tatame,  
 remne re paku pete tetane.

(Gutpela Sindaun 11:31)

<sup>19</sup> Opkap, God re kiyi mus mette wem tatame, rem wule yenbo som nenbet. Rem remne nenem God rene omuteke som habobet. Re remne yenbo nente wem, re etop nente tetane.

## 5

*Kem keryen tame, kem God reri tatame remne heyar lakerebet.*

<sup>1</sup> Sene an Jisas rene omuteke habobo tatame remri keryen tame, kemne tuma wuri wete. Aren mere, an Jisas rene omuteke habobo tatame remri keryen tame wuri. Kraisi re mus metbem, an etop ari leklabem. Kraisi re hadebaswaikene tegek tete, aren, keremkene nem etop lan hadebaswaikene kirkir potte tetane. Eker an kemri wuribai lisokon yaku tuma wesowte nenbo. <sup>2</sup> An kemne webo, kem God eterri tatame remne heyar lakere. Rem sipsipkap. God re remne keremri letke rasen



lakerete wem. Tame rem kemne yak kap rin kem er yaku nenbet. Kemri wuribaike kem er yaku okbop ten nenbet. God re etop selbo. Kem tokwo potte kap habote. Yehow. Kerem, kem er yaku pap teten murese nenbet. <sup>3</sup> Kem keremri kulke tetane tatame remne kap teitkwunen remne tuma kap kwobke kwobke wete. Kem God reri wule yenbowou nenen remne wule yenbo ek kebese mukutekte. <sup>4</sup> Op nente, kemne Lakere Tame Bukre, re tegek tete, kem hadebas som temente wos ek potte tetane.

*Nem kworer God eterri letke raste.*

<sup>5</sup> Kem muyensi yen tatame, kem etopwou nente. Kem keryen tame etemri kulke temente. Kem aboyei, kem kworer teitkwunen awosein awosein kwobo labet. God Reri Tuma op webu.

Kworer gabobo tatame

God re remne teitkwunbo.

Kworer teitkwunbo tatame

remne God re pap meten

heyar nenbo.

(Gutpela Sindaun 3:34)

<sup>6</sup> Kem kitimenakene God eterri kulke temente. Kem keremri sig kworer teitkwunte. Op nente, God eter wete yabelke re kemne sig bukri wete tetane. <sup>7</sup> God re kemne habobo, eker kemri op habo op habobo wos kem eterri letke raste.

<sup>8</sup> Kem ei heyar sin kowte. Kemri peiktame, Satan, re meknik sewurbo. Boulri laion mow wale re sewuren taye pitbokap, Satan re etopkap nenbo. Re tame wuri rene tan kuw yakene ate sopbo. <sup>9</sup> Kerem mus metbokap, agerbo nowselri God rene omuteke habobo gesmase, rem er mus

kirkir metbo. Kem etop mettene, eker kem God rene omutekewai habon murese teten Satan rene sewaité. <sup>10</sup> Kem mus meten rane yabel tetek, Pap Meten Kwobo Nugwape Labo God eter, re kemne heyaren nenewayen teteruwen kitimena sene newote tetane. Kem murese sene tetete. Ekeya. Krai eterke God re kemne wepoten kem eterri hadebaswai kwomke yin heyar somsom etek temente tetane. <sup>11</sup> Eterri kitimena bukri somsom temente. Et sekenewai.

*Tuma tep.*

<sup>12</sup> Sailas re anne kwobo lan an gwor tuma eisow kemne basrasbo. An webo, re Jisas eteri yaku omuteke nenbo tame. Kem pap yenbo tete, an etop selbo, eker an gwor tuma kemne basrasbo. Et God eterri pap meten kwobo labo wule sekene. Kem er wule omutekewai habon muresen te.

<sup>13</sup> Babilon kwomke tetane Jisas rene omuteke habobo tatame etemne mere, God re remne wepotem, rem kemne pir webo. Ari yen, Mak, eter mere, re kemne pir webo. <sup>14</sup> Krai reri pap yewobo wulek kem awosein awosein pir wen tak ne kere an kerete.

Kem Krai rekene bogtene tatame, kem pap yenbo temente.

**God Reri Teiktem Tuma Ager  
The New Testament in the Yamano Dialect of the  
Yessan-Mayo Language of Papua New Guinea  
Nupela Testamen long tokples Yssan-Mayo Yamano  
long Niugini**

copyright © 1980, 2004 Lutheran Bible Translators

Language: Yessan-Mayo (Yamano) (Yessan-Mayo)

Dialect: Yamano

Translation by: Lutheran Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-01-09

---

PDF generated using Haiola and XeLaTeX on 22 Feb 2024 from source files dated 31 Aug 2023

61a6ffd9-3aa5-58b7-982d-b5ada9490557